

Morning Dogri (NSD) National News Bulletin 29-11-2024

आकाशवाणी

- प्रधानमंत्री नरेन्द्र मोदी होर अज्ज थमां ओडिशा दे त्रऊं दिनें दे दौरे पर रौहंगन। ओह राजधानी भुवनेश्वर च पुलस महानिदेशकें ते पुलस महानिरीक्षकें दे अखिल भारतीय सम्मेलन सनें केई कार्यक्रमें व हिस्सा लेंगन।
- लोकसभा नै वक्फ संशोधन बिल सरबंधी सांझी संसदी समिति दा कार्यकाल ब'रे 2025 दे बजटइजलास तगर लेई बधाई दित्ता ऐ।
- महाराष्ट्र दे मुख्यमंत्री दे नां बारे मुकदा फैसला लैने लेई महायुति दे नेताएं गृहमंत्री अमित शाह हुंदे'नै मलाटी कीती।
- उत्तर प्रदेश दी सरकारै संभल च हिंसक वारदात दी न्यायिक जांच दे हुक्म जारी कीते न।
- केन्द्र सरकारै खुल्लै समुंद्रै अंदर खनिज ब्लॉकें दी पैहली खेप दी नीलामी कल नमीं दिल्ली च शुरू कीती।
- मर्दे दी जूनियर एशिया कप हॉकी प्रतियोगिता च कल मजूदा चैंपियन भारत नै जापान गी 3-2 कन्नै हराई दित्ता।



PM Odisha

प्रधानमंत्री नरेन्द्र मोदी अज्ज थमां त्रऊं दिनें दे ओडिसा दौरे पर रौहंगन, जेहदी शुरूआत केई कार्यक्रम च शामिल होने कन्नै होग ते इंदे च भुवनेश्वर च पुलस महानिदेशकें ते पुलस महानिरीक्षकें दे अखिल भारतीय सम्मेलन शामिल ऐ। त्रै रोजा चलने आला एह सम्मेलन अज्ज थमां लोक सेवा भवन च शुरू होआ'रदा ऐ। सम्मेलन च गृहमंत्री अमित शाह ते राष्ट्रीय सुरक्षा सलाहकार अजीत डोभाल सनें होर केई मन्ने परमन्ने दे लोक बी शामिल होंगन। सबै राज्यें दे पुलस महानिदेशक ते केन्द्रीय रिजर्व पुलस बल, अनुसंधान ते विशलेषण स्कंध(रॉ), राष्ट्रीय सुरक्षा गार्ड, सतर्कता ब्यूरो ते एसपीजी दे प्रमुख सम्मेलन च हिस्सा लेंगन।

सम्मेलन च राष्ट्रीय सुरक्षा चुनौतिएं ते पुलस बलें दी उभरती जिम्मेदारिएं पर चर्चा होग। सम्मेलन च आंतरिक सुरक्षा, साईबर अपराध, माओवादी खतरे, आर्टिफिशल इंटेलीजेंस ते ड्रोन जनेही उभरती तकनीकें दे कारण पेश आवा'रती चुनौतिएं पर बी सोच-बचार होग। इस दरान आतंकवाद कन्नै निबड़ने पर बी चर्चा कीती जाग।

<><><><><><>

PM Youth

प्रधानमंत्री नरेन्द्र मोदी होरें युवाएं दे भविष्य गी सुरक्षित बनाने लेई उनें गी सब्बै मौके मुहैया करोआने दे धेइयै गी दोहराया ऐ। **My Gov India Handle** दी इक पोस्ट पर प्रक्रिया दिंदे होई श्री मोदी होरें पक्की मेद बन्नी जे भारतीय युवा शक्ति नामुम्किन मुम्किन बनाई सकदी ऐ।

<><><><><><>

LS Waqf Bill

लोक सभा नै कल वक्फ संशोधन बिल पर सांझी संसदी समिति गी बजट सत्र दे अगले दिन तगर अपनी खीरी रिपोर्ट पेश करने आस्तै प्रस्ताह पारित कीता गेआ ऐ। कमेटी दे अध्यक्ष ते बीजेपी दे नेता जगदंबिका पाल होरें लोकसभा च इसी पेश कीता ते इसी ध्वनी मते कन्नै मंजूर करी दित्ता ऐ। बुधवारें विपक्ष दे भिबरें सदन थमां वाल्क आउट कीता ते दोश लाया जे मसोदे गी तैआर करी दित्ता गेआ ऐ। लोकसभा नै 8 अगस्त गी कमेटी दा गठन कीता हा ते कमेटी नै अपनी रिपोर्ट 29 नवम्बर गी जमा करोआनी ही।

<><><><><><>

Shah Shinde Meet

महाराष्ट्र दे कार्यवाहक ते शिवसेना नेता एकनाथ शिंदे , बीजेपी नेता देवेन्द्र फडणविस ते राष्ट्रवादी कांग्रेस पार्टी प्रमुख अजीत पवार होर कल गृहमंत्री अमित शा होरें नमीं दिल्ली च मलाटी करियै राज्य च सरकार दे गठन पर चर्चा कीती। इस मौके पर केन्द्री मंत्री ते बीजेपी अध्यक्ष जे.पी.नड्डा होर बी मजूद हे। एकनाथ शिंदे होरें पैहले गै आखी दित्ते दा ऐ जे राज्य च सरकार बनाने दी प्रक्रिया च ओह रोड़ा नेई बनगन ते राज्य च केन्द्र दे बड्डे नेताएं दी अगुवाई च उंदे फैसले दा समर्थन करगन।

मगरा इक सोशल मीडिया पोस्ट च बीजेपी दे नेता देवेन्द्र फडणविस होरें राज्य च विधानसभा चुनाएं च समर्थन देने लेई आभार प्रगट कीता। उनें पार्टी कारकुनें गी प्रेरित करने ते उंदा हौसला बधाने दा श्रय अमित शाह होरें गी दित्ता।

<><><><><><>

Amit Shah Terrorism

केन्द्री गृहमंत्री अमित शाह होरें आखेआ ऐ जे पिछले 10एं बरें च आतंकवाद, खब्बे धड़े आले अत्तवाद, विद्रोह ते नशाखोरी खलाफ महत्वै आली कामयाबी हासल कीती ऐ। लाल बहादुर शास्त्री नैशनल उे मंसूरी च प्रशासन अकैडमी च श्री शाह होरें विदाई समारोह गी संबोधत करदे होई आखेआ जे केन्द्र च मजूद प्रधानमंत्री नरेन्द्र मोदी हुंदी अगुवाई आली सरकारै दी ठोस नीतिएं करी गै एह खरे नतीजे हासल होए न। मंत्री होरें इस गल्लै पर जोर दित्ता ते खब्बै बक्खी आले अत्तवाद गी पूरी चाल्ली 31 मार्च 2025 तगर पूरी चाल्ली खत्म करी दित्ता जाग।

<><><><><><>

Kishtwar

आतंकवाद नेटवर्क पर कीती गेदी कारवाई च किश्तवाड़ च जम्मू कश्मीर पुलसै नै पाकिस्तान दे कब्जे आले कश्मीर ते पाकिस्तान थमां कम्म करा'रदे 70 आतंकवादिएं दी संपत्ति गी कुर्क करी दित्ता ऐ। आकाशवाणी संवाददाता होरें एसएसपी किश्तवाड़ जावेद इकबाल मीर हुंदे हवाले कन्नै अपनी रिपोर्ट च आखेआ ऐ जे कारवाई यूएपीए दी बक्ख-बक्ख धाराएं तैहत इक स्पेशल एनआईए कोर्ट थमां हुक्म हासल करने मगरा कीती गई ऐ।

<><><><><><>

UP

उत्तर प्रदेश दी सरकारै संभल दी हिंसक घटना दी न्यायिक जांच दे हुक्म दित्ते न। इस घटना च 4 लोकें दी मौत होई गई ऐ। हाई कोर्ट नै सेवानिवृत्त न्यायधीश देवेन्द्र कुमार अरोड़ा हुंदी प्रधानता च त्रऊं सदस्यें दी समिति इस मामले दी जांच करोग। समिति च भारती प्रशासनिक सेवा दे सेवानिवृत्त अधिकारी अमित मोहन प्रसाद ते भारती पुलिस सेवा दे साबका अधिकारी अरविंद कुमार जैन बी शामिल न।

समिति दऊं म्हीने दे अंदर अपनी रिपोर्ट जमा करोआग। समिति एह जांच करोग जे जामा मसीत बनान हरिहर मंदर विवाद मामले च अदालत आस्सेआ दित्ते गेदे हुक्मै मूजब सर्वेक्षण करोआए जाने दे दरान 24 नवम्बर गी होई दी हिंसा पैहले थमां रची गेदी साजश ही जां इक आम अपराधिक वारदात ही।

<><><><><><>

Reddy

खान्नें सरबंधी मैहकमे दे केन्द्री मंत्री जी.किशन रेड्डी होरें कल नमीं दिल्ली च खुल्ले समुंद्रै अंदर खनिज ब्लॉकें दी पैहली खेप दी नीलामी दी शुरूआत कीती। इस गेड़ च अरब सागर ते अंडेमान सागर दे 13एं खनिज ब्लॉकें दी नीलामी कीती जाग। इनें ब्लॉकें दे खनिज बुनियादी ढांचे दे विकास, उच्चे स्तर दे तकनीकी निर्माण ते हरित ऊर्जा गी अपनाने लेई महत्वपूर्ण न। श्री रेड्डी होरें इस मौके पर आखेआ जे भारत हून दुनिया दे ओकड़े किश गिने-चुने दे मुलखें च शामिल होई गेआ ऐ जेहड़े कंडे थमां दूर खुल्ले समुंद्रै चा खनिज कड़डने दा विकल्प चुना करदे न। श्री रेड्डी होरें आखेआ जे कोबाल्ट, निकल, तांबा ते मैंगनीज जनेह् खनिजें दी मंग भविष्य च होर बधोग। उनें आखेआ जे भारत अपना खनिज मिश शुरू करोग जेहदे कन्नै खनिज बजारै च भारत दी स्थिति मजबूत होग ते आर्यात पर निर्भरता बी घटोग।

<><><><><><>

J&K Panchayats

पंचैती राज मंत्रालय नै जम्मू-कश्मीर च 500 नमें पंचैत घर यानी ग्राम परिषद दफतरें गी मंजूरी दित्ती ऐ। प्रदेश दे ग्रामीण विकास ते पंचैती राज विभाग दे सचिव मोहम्मद ऐजाज अस्सद होरें कल एहदा ऐलान कीता। उनें गलाया जे प्रदेश दे किश ब्लॉक ते पंचैतां खरा प्रदर्शन करै करदे न, जदके होरनें च सुधार दी लोड़ ऐ। उनें आखेआ जे जरूरतमंद खेत्तरें दी पन्छान करी लैती गेदी ऐ ते उत्थें मुद्दे गी हल करने लेई समें सीमा तय कीती गेई ऐ। अस्सद होरें इब्बी दस्सेआ जे खस्ताहाल पंचैत घरें गी कम्मकाज जोग बनाया जा करदा ऐ।

<><><><><><>

Hockey

ओमान दी राजधानी मस्कट च मर्दे दी जूनियर एशिया कप हॉकी प्रतियोगिता च कल मजूदा चैंपियनदभारत नै जापान गी 3–2 कन्नै हराइयै इस प्रतियोगिता च अपनी लगातार दूई जित्त दर्ज कीती ऐ। एह्दे शा पैहले भारत नै थाईलैंड गी 11–सिफर कन्नै हराइयै इक बड्डी जित्त अपने नां कीती ही। भारत दी तरफा थोक चोम किंगसन सिंह, रोहित ते अरायजीत सिंह हुडल नै गोल कीते हे। कल भारती टीम चीनी ताइपे दे कन्नै ते फही तारे कोरिया कन्नै ग्रुप स्टेज दे खीरी मकाबले खेडोग।

<><><><><><>

2025 Champions Trophy

अंतर्राष्ट्रीय क्रिकेट परिषद यानी आईसीसी, चैंपियंस ट्रॉफी 2025 गी लेइयै कल इक वर्चुअल बैठक करने आहली ऐ, जेह्दे च एह् साफ होई जाह्ग जे टूर्नामेंट पाकिस्तान च होग जां नेई। एह् टूर्नामेंट 19 फरवरी थमां मार्च म्हीने तगर होने आहली ऐ, पर आईसीसी नै हूनै तगर आधिकारिक कार्यक्रम जारी नेई कीता ऐ। बैठक च इस गल्लै पर चर्चा होग जे क्या टूर्नामेंट पूरी चाल्ली कन्नै पाकिस्तान च आयोजित कीता जाह्ग जां हाइब्रिड मॉडल दे तैहत होग, जेह्दे च पाकिस्तान दुए देश दे कन्नै मेजबानी दिआं जिम्मेदारियां सांझी करोग, जिसी अजें तय नेई कीता गेआ ऐ। एह् बैठक पाकिस्तान क्रिकेट बोर्ड गी आईसीसी दी तरफा लिक्खी गेदी ओकड़ी चिट्ठी दे बाद सददी गई ऐ जेह्दे च आखेआ गेआ ऐ जे भारत 2025 दी शुरुआत च चैंपियंस ट्रॉफी लेई पाकिस्तान खेड्ढन नेई जाह्ग।

<><><><><><>